

海南地方志丛刊
海南地方文献丛书编纂委员会汇纂

咸丰 琼山县志

(外一种)
下册

(清) 李文烜修
郑文彩纂
(清) 张廷标编辑
海南出版社



海南地方志丛刊
海南地方文献丛书编纂委员会编纂

主 编 洪寿祥
执行主编 周伟民

咸丰琼山县志

(清) 李文烜修 郑文彩纂

光绪琼山乡土志

(清) 张廷标编辑

下册



海南出版社

图书在版编目(CIP)数据

咸丰琼山县志:外一种/(清)李文烜等编纂;邓玲等
点校. -海口:海南出版社,2004.10
(海南地方志丛刊/洪寿祥,周伟民主编)
ISBN 7-5443-0970-3

I. 咸... II. ①李... ②邓... III. 琼山县—地方志
—清后期 IV. K296.64

中国版本图书馆 CIP 数据核字(2004)第 050111 号

咸丰琼山县志

邓玲 邓红 点校

光绪琼山乡土志

朱靖华 池曦朝 点校

责任编辑:袁大川

*

海南出版社出版发行

(570216 海口市金盘开发区建设三横路 2 号)

全国新华书店经销

湖南新华印刷集团有限责任公司(南)印刷

2004 年 10 月第 1 版 2004 年 10 月第 1 次印刷

开本:880×1230 毫米 1/32 印张:42.25

字数:746 千

ISBN7-5443-0970-3/K·122

定价:136.00 元

海南地方文献丛书编纂委员会

顾	问	陈玉益	蔡长松	周文彰	王学萍
主	编	洪寿祥			
执	行	主	编	周伟民	
常	务	副	主	编	郑行顺 袁大川
副	主	编	徐 庄	潘在积	
编	委	王经华	李昭淳	刘剑三	
		余 虹	张三夕	张春明	
		侯月祥	倪俊明	唐玲玲	
编	务	杨德禧			

《咸丰琼山县志》点校 邓玲 邓红

《光绪琼山乡土志》点校 朱靖华 池曦朝

人物志十五

贞节

明 国朝

明

李氏，夫失传，许字未嫁，夫染恶疾，夫族将火化之。氏闻期，与媒往视，火发，感激涕泣，遂赴火殉夫死。夫家因合葬于五里亭南大路边，墓前有坊，书明“贞节烈妇李氏墓”。昔有文宗越此，轿顶忽颺起，疑问，得知其事，因题诗曰：“未谋夫面伴夫亡，不比寻常烈女行。白发尚难全晚节，青年谁肯负春光。魂归峒里乾坤老，名播人间草木香。我辈未尝轻洒泪，为他千古振纲常。”

国朝

卢氏，上东岸人，许字周建贤，年十六未嫁而建贤卒。氏哀恸不胜，登门奔丧，孀守白首无玷。抚嗣孤世标，能以母兼父道，年五十有一。乾隆十年请旌。

郑氏，苏寻二图美帖村冯琮妻，未嫁而琮亡，郑哀恸不欲生。琮胞弟举人玠憫之，迎于家以遂守贞之志，松筠励操，白首无玷。乾隆四十五年，吏部尚书协办大学士蔡新以“贞柏流芳”匾旌之，寿八十卒。

谢氏，林其玫聘妻，嘉庆三年旌。

李氏，兆祥女，许字城内东周巷郑同明。未婚，夫卒，李闻讣奔丧，守节，家贫如洗，冰操三十余年。里邻好义者悯其孤苦，共捐置铺二间，取租息以贍之。

林氏，许字沈镛，未婚而镛夭，林奔丧守义，事亲能执妇道，抚侄为嗣，卒年六十。

陈氏，下田邝龙恭聘妻，包仑陈文贤女，年十七，娶日已定，期未至而龙恭亡。陈登门守节，食素终身，事翁姑，抚继子，辛苦数十年，冰霜如一日。道光乙酉旌，建坊北门外。

王氏，博盛一都黄元镗聘妻，年十八未字，镗暴亡。氏闻，痛哭几绝，毅然登门守节，父母亲属再三劝谕，不允。遂归黄家，终丧，贫无立锥，勤女红以供舅姑，抚侄子以延嗣。有怜其贫而赙之者不受。或讽之嫁，即取棉花塞其耳。苦节七十七年，寿九十五。里党嘉其贞节，举人杜应清为之传。

冯氏，洪见邦聘妻，沙上村人，年十六方聘而夫亡。毅然登门守节，父母慰之，亲邻慰之，舅姑再三推辞之，俱不允。及葬，至棺所长哭而哀，观者为之泣下。守丧三年，不复归母。家贫无寸产，织蒲度日。道光甲申，年饥，斗米钱八百，乡人怜其贫而赙之，不受。集蓼忍荼，毫无怨言。顺事舅姑，始终尽礼。年五十余卒，道光己亥旌。

人物志十六

守 节

明 国朝

明

韩氏，西厢人，大学士濬子丘敦妻，文昌韩继芳女。成化癸卯，韩年二十四，敦赴国学，娶舍人徐恭女为侧室，离家凡八年，卒于京邸。韩与徐氏守节终身。

韩氏，陈菊芳妻，年十九孀居苦节，父母窥其贫窘，倍与资奁，令改适。韩痛哭，抚孤自矢。父母诱之归，至门而返。移居夫墓傍，旦夕泣扫，至老不移。孝廉张学颜称其完节以比共姜云。

谢氏，左所人，庠生海瀚妻。年二十八寡，子忠介公瑞甫四岁，家计萧条，谢矢志鞠育，口授《孝经》、《学》、《庸》诸书，长就外傅，少有戏谑，必严辞训饬之。后瑞领乡荐，官至右都御史，以气节名天下，谢之教也。府道欲请旌，当路有与瑞左者遂沮其事。

丘氏，海忠介公瑞继室，年十四归瑞，事姑孝，二十八寡，抚孤孙延嗣。

张氏，东厢人，唐世兴妻。隆庆六年，倭贼攻海口，人村伤其父，兴持梃救父，为贼所杀。张年二十七，食贫孀

守，孤苦零丁，四十八年如一日，人谓天孝妇节，世所罕有。

周氏，西厢人，生员潘积妻，年十八归潘，越三年而寡，孝事舅姑，抚训遗子成立，与潘孝廉之楫母时称双节云。

王氏，那邕人，丁酉举人张玉妻，赋性醇谨，涉书史。年二十适玉，逾六载玉应会试，卒于道，讣闻，哀毁欲绝。或劝之再醮，王曰：“石烂海枯，吾志不移也。”纺织教子，年六十二卒。

黄大娘，苍原陈以忠妻，年二十二寡，抚孤子尚之，矢志不渝。

李氏，中所唐福妻，年二十五寡，未几子女三人俱夭，孀守终身。

莫氏，东洋周宣妻，年二十寡，毁容守节，摘发垂尽，及老，人呼为“秃头婆”，正统间县以上闻。

蔡氏，前所杨铨妻，年二十一寡，守节不改。

黄氏，苍原陈表妻，定安训导黄景晟之女，年二十四寡，守节终身不改。

路氏，左所千户舍人王班妻，同所百户琮女琮或作踪，年二十一寡，无子，誓不再醮，完节终身。

陈氏，右所温鉴妻，年二十七夫亡，励志守节，终身不变。

王氏，苍原许荫妻，教授王用之女，年二十三寡，矢志孀守，克全其节。

黄氏，东厢郡庠生唐惇妻，贡生唐绍祖次媳，御史唐舟孙媳。年二十寡，矢志守节，孝事翁姑，教育嗣子，长登仕籍，寿八十六。

郑氏《张志》作邓氏，谢有冯妻，生男甫周月，夫亡，苦节孀居，纺绩自给，年六十卒。

田氏，前所生员钟秀妻，年二十九寡，无子，奉亲孝，为乡里所称，正德戊寅郡守上其节，年八十卒。

朱氏，海南卫镇抚舍人陶懋妻，左所百户朱灿之姊。年三十寡，生遗腹子钰，抚育成立，食贫守节，闺门肃然。

林氏，苍原都廩生陈钺妻，事翁姑以孝闻。年二十九钺卒，欲以身殉，左右劝之曰：“即死，如诸孤何？”氏遂矢志孀守，课子宗濂、宗濬领乡荐，宗洙、宗泗游太学，人称贤母，寿七十余终。

冯氏，生员张希曾妻，年二十二曾亡，剪发入殓，誓不再醮。苦节自甘，立嗣抚孙，孀居五十余载，寿七十余。

国朝

唐氏，庠生珍女，适林茂，年二十四寡，值鼎革兵燹，连年饥馑，氏以女红抚一子一女，皆婚嫁。子名朱审，读书入武泮，克尽孝养。氏年七十六终。

谢氏，贡生清女，适庠生周特杰次子燦。年三十寡，

守节抚孤，值变乱饥馑，荼苦食贫，课二子读书，长子至郡廪生，次子圣邑庠。氏年七十余，学院樊公泽达旌其门曰“以节成慈”。

彭氏，明兵备道中军徐后达妻，年二十二丧夫，遗孤三人，长履益甫六岁，次作楫、云裁皆襁褓，值鼎革饥馑连年，氏矢志抚孤，教育三子，相继入泮，未久相继夭亡，与寡媳胡氏鞠育孤孙徐祐成立，苦节六十余年，寿八十二。

林氏，桂林都庠生高配天妻，年二十夫故，家贫甚，子锡纯在襁褓，守节教子，锡纯府庠明经，执经门下者多成名，氏年七十终。绅士请旌，匾其门曰“淑节遗芳”。

许氏，桂林高台妻，年十五归台，翁姑早丧，惟祖姑在堂，年二十夫客死会同，哀痛几绝，乃鬻奁变产，运柩归葬。一子二岁，一子弥月，以次者为伯兄嗣，自抚育二岁孤儿，勤纺绩以养祖姑。其子方成立而卒，亲党悯之，讽使早思变计，氏泣曰：“高门不幸，吾何怨焉？”终不贰志，孀守凡三十余年。

张氏，兴仁都陈启蕴妻，年二十一寡，生子绍仁或作荣二岁，有以子幼家贫劝其他适，氏励志益坚，奉事翁姑惟谨，辛苦操作，躬纺织以供养，及终丧葬尽礼。夫有幼弟三人，俱为完娶，妯娌和睦，孀守三十年如一日。

黄氏，方伯宏字孙女，适处士辜全斌，生二子，一哺食，一弥月，舅姑早亡，年二十四夫歿，鬻奁殡葬，矢志栢

舟。值海黎乱，携二子逃匿山中，三日不火，采木叶食之，贼复纵狗搜山，昏迷中仅见其夫指引逃处，得免。寇靖，连年凶旱，饮冰茹荼，殷勤纺绩教子。长男早夭，次男弘亮食廩饩。

林氏，西厢人，王相臣妻，澄庠汝骥母。年二十二寡，鞠育一子，永无二志，勤纺绩以奉翁姑，自甘淡薄，寿六十。人无间言。

符氏，西厢人，郡廩潘待聘妻，庠生嘉祉女。年二十夫死，氏思以身殉，念弱子翁姑无托，乃矢志孀守，养亲抚孤，辛勤备至。岁饥谨，乱离相继，氏拮据支持，其子之璘膺岁荐，人以为苦节之报，年八十卒。

蒙氏，渲洲白沙村王廷俊妻，年二十六寡，家贫，又无期功亲可倚。舅氏悯其孤苦，劝他适，氏严词以拒，纺织，食贫抚孤，后孙子众多，寿七十三。

林氏，东厢人，庠士苏和妻，郡庠廷魁媳，年二十一寡，家徒四壁，氏孀守耐贫，勤绩纺以佐子读。子明试食饩郡庠，皆画荻和丸力也。年八十终。

郑氏，大英庠士陈良贵妻，邑庠郑人伟女，年十八夫故，生子焕，时方襁褓，氏保孤备历艰辛，坚贞不改。

周氏，上东岸都人，林大经妻，年十六归经。甫二载，夫歿，子森方襁褓，终窶且贫，氏长斋茹淡，矢志抚孤，历久不变节。署县宋匾其门曰“贞节流芳”。

赵氏，顿林人，李际春妻，年二十四，子挺栳方在襁褓，夫渡海溺亡，欲以身殉。而呱呱待哺，隐痛含冰三十余年，经寇乱，备尝艰辛，而其节益坚，有司给匾“玉骨冰操”。

吴氏，东昌都邑庠黄为弼妻，二十五岁为弼死，誓不再适，教育二孤廷极、廷柱，茹荼饮蘖，历尽酸辛，人皆钦其阃范。

陆氏，顿林都邑庠黄瑞妻，年二十六岁或作四载失偶，冰霜矢志，闺门肃然，子锄锄或作瑚庠生。

何氏，琼南北人，贡生魁宿女，陈垓妻，年二十三垓卒，誓不再醮，家计萧条，奉亲皆合礼法，抚孤先哲成立，孀守三十六年。

陈氏，顿林都贡生王君极妻，年二十五丧偶，甘心守节，奉事翁姑，抚养嗣孤，针黹以助家计，孀居三十一年，族邻俱无间言，有司请旌表。

张氏，东厢二甘润美妻，年二十一夫亡，仅育一女，栢舟矢志，冰霜苦节，年五十卒。

陈氏，冠英坊庠生吴希圣妻，年二十四失偶，坚志守节，无玷清闺。抚子继周成立，年五十有五。

谢氏，海口一庠生林维学妻，二十八岁维学卒，誓死完贞。奉老姑，抚孤孩，备尝艰辛，孀守三十余载，子辉先，武庠。

陈氏,东关符万安妻,汝和母,年二十四丧偶,栢舟矢志,抚育遗孤,母兼父道,孀居三十余秋,励节完贞,邑里敬其壶仪。

洗氏,南关邑庠吴经邦妻,年二十三夫歿,矢志坚贞,抚二子早逝,又抚稚孙廷璠、廷琇,提携成立,卒年六十三。

王氏,梁启学妻,年二十五梁故,誓不再嫁,奉姑海子,艰苦备尝,尤能持家政,上下帖然,子雕凤,庠生。年六十余卒。

杨氏,庠生吴道南妻,生员沅母,年二十六寡,事翁姑妇兼子职,抚稚子母兼父道,族党称“白璧无瑕”。

陈氏,年十六适何大开,二年寡,茕茕嫠妇,志坚金石,遗孤光衢生九月,提携教诲,以迄成人。

徐氏,王天佐妻,夫早逝,子殿元甫六岁,贞守抚训,以全节终。

王氏,生员郑绍斌妻,年二十五寡,食贫守节,孝奉髦姑,教育孤儿,动合礼法。卒年五十二。

王氏,生员瑞华女,陈文炳妻,年十八归陈,逾六载夫故,子于佩仅四龄,氏矢志靡他,家贫纺绩,奉姑,训子成人,有文名,年五十八卒。

李氏,陈圣学妻,早寡,奉二亲尽孝,训育二子有家法,长炳斗邑庠,次辉斗领乡荐,任山东博兴县知县,年六

十六卒。

陈氏，冯文忻妻，年十七归冯，八年夫歿，陈誓无二志，力贫抚孤子廷瑛膺贡选，孀居三十余载，完节无忝。

李氏，吴铤宝妻，年二十五寡，守贞垂三十年，抚孤子昌儒，教诲有方，族党咸钦壶范。

潘氏，岁贡文宠女，年十八适廩生陈圣哲，三载圣哲亡，无子，潘誓以身殉，念二代公姑俱衰迈，茕茕无依，乃强视息，织紵以供菽水，孀守三十五年。

王氏，廩生周李松妻，举人王宾女，年十八归周，五载夫亡，节凜冰霜，嫠居三十余年，无玷。性喜施舍，修治桥路，乡人德之。

莫氏，周埜妻，年十七赘埜，逾年埜死，无子，守义事翁姑，生养死葬如礼。抚侄丙为嗣，苦节四十载。

郑氏，蒙维灿妻，早寡，家徒壁立，有讽令再适者，郑截发自誓。日勤女红，奉翁姑，抚训藐孤光碧补郡庠，寿六十有八。

陈氏，郑树鼎妻，年二十六寡，矢志靡他，孝事老姑，姑歿，罄奩营丧葬，训子瑛入庠，有画荻风。又念伯兄无嗣，大宗不可绝，以己子为之后，没齿无怨。人称为女中君子，邑令鲍启泌旌其门。

游氏，博盛都杜常辉妻，年二十六寡，誓不改适，事舅姑养生送死无憾。抚七月孤攀棱，教育成立，孀居三十

年,艰辛备历,乡党称为苦节。

吴氏,张吴东图生员高超妻,年二十四寡,矢志栢舟,自甘淡薄,事老翁以孝,抚嗣子以慈,守贞三十四年,清操不改。

张氏,岁贡字泰女,年十五适洪世琮,甫四载,琮故,家贫无子,与孀姑相依,父母欲夺其志,张曰:“我嫁,寡母何依?”誓不改。日勤女红以供甘旨,姑歿,丧葬尽礼,守节终身。

王氏,邑庠必禄女,年十八归詹登科,逾四年寡,守节,事髦姑以孝闻,抚侄经文为子,寓严于慈,经文由邑庠食饩膺贡,王犹惓惓勗以力学。闺门整肃,孀居三十一年,邻人罕覩其面。

陈氏,朱光琰妻,年二十二寡,遗子甫二岁,家贫,陈守节不二,躬织紵奉姑,忍饥哺子,姑歿,哀动乡里,殡葬合礼,完节而终。

张氏,贡生必达女,年十七归丘瑛,逾年瑛故,家贫,无子,父母怜其幼,令再醮。张励志益坚,事姑得其欢心,抚犹子士侯为后,苦节三十九年,教谕钟灵以“古节冰霜”旌之。

陈氏,庠生其珍女,年十七归王允予,予往外教读,死,陈变衾扶榇回葬,训子绍先列邑庠,教授黄壮表其门。

陈氏,蒙圣连妻,年二十五夫歿,二子在抱,陈拮据奉

翁姑，抚二子，孝慈无间，长子娶陈氏，生二男而夭，次子娶张氏，举一子亦亡，一姑二媳皆守义，相依为命，一门三节，尤世所罕觐者。

罗氏，东厢冯廷佐妻，年二十二寡，生遗腹子成，茹荼饮蘖以养姑，姑歿，为营殡葬，竭力摒挡，孀居三十五年，无玷清节。

丘氏，年十八适贡生潘相国，逾五载夫亡，孀守，奉翁姑克尽孝养，抚嗣子命九补弟子员，寻歿，妇冯氏年二十二，遗孤和介方在抱，姑妇食贫鞠，和介亦列胶庠。丘寿八十三，冯年六十余，学使王际华旌其闾“一门双节”，乡里重之。

饶氏，年十九适丘宗邦，六年夫故，遗二孤，家贫，翁姑多病，侍奉唯谨，翁姑歿，丧葬尽礼，持家训子，年六十四岁终。

赵氏，张应朝妻，年二十七寡，勤女红，敬奉翁姑，抚遗孤宏猷成立，孀居六十三年。

邢氏，岁贡生尔麟女，年十七适张公模，十九夫故，举遗腹子，守节，孝事翁姑。子娶妇，寻歿，择侄孙为嗣，恩勤尤笃，与寡媳相依五十余年，学使程岩旌以“节义可嘉”。

林氏，生员冯茂春妻，年十六归春，二载夫逝，含殓毕，欲以身殉，翁姑以亲老子幼谕止之，事舅姑以孝闻，簪

灯课子，寓慈于严，寿七十。乾隆三十五年，学使翁方纲旌曰“栢节松操”。

潘氏，岁贡生湘孙女，适李钟芳，年十九寡，截发明志，立继嗣，勤机杼以供翁姑，生事死葬如礼，教授钟南麟表其门曰“金玉完贞”。

冯氏，廪生永祚女，年十六归谢佇运，越五载而寡，遗孤在抱，甘贫守义，苦节五十年，始终如一。

曾氏，庠生黄仕越妻，年二十三夫故，遗孤五龄，曾栢舟自矢，勤纺绩，事翁姑，丧葬独任，教子成立，年五十二终。

沈氏，博茂人林润珩妻，年二十寡，林兄弟偕亡，父母老而无依，氏克殫妇职，清操自持四十余载。

谢氏，张书升妻，年二十四夫亡，无子，誓不再醮，孝养毫姑，抚嗣子玉凤，教以义方，补郡庠，霜操历三十余年如一日。

张氏，王冕妻，年二十夫亡，累日不食，誓从死，其姑曰：“尔死，无愧尔夫，如老身无依何？”氏遂忍死，勤女红以供甘旨，抚犹子减己食以哺之。族有怜其贫捐田资饘粥者，却不受。贞洁自守，至老益坚。

王氏，廪生潘朝敬妻，年二十五夫亡，子家骏甫三龄，志矢冰霜，家贫纺织，奉髦姑必诚必敬。子稍长，命就外傅，教诲严肃，后列胶庠，学使翁方纲旌之曰“节比松